

**Date – 24/02/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizo hmeichhia ten hnamdang an neih hnua an Mizo-na ti tawp a, tribal an nihna an fa ten an chhawm theih lohna tur The Mizo Marriage and Inheritance of Property (Amendment) Bill, 2026 chu vawiin khan Assembly in lungual takin a pawm.
2. Eptu MLA ten Chief Minister Pu Lalduhoma'n ZPM kaihruai sorkarin sorkar hmasa leiba a rulh sak tia sawi fo chu an ngaimawh tih an sawi.
3. Chief Election Commissioner Gyanesh Kumar chuan electoral roll dik tak neih chu mipui rorelna democracy inngahna bul anih thu a sawi.
4. President Droupadi Murmu-i chuan ni hnih cham turin vawiin chawhnu khan Maharastra a thleng.

<><><>

**SESSION-MIZO MARRIAGE BILL**

Mizo hmeichhia ten hnamdang an neih hnua an Mizo-na ti tawp a, tribal an nihna an fa ten an chhawm theih lohna tur The Mizo Marriage and Inheritance of Property (Amendment) Bill, 2026 chu vawiin khan Assembly session ah lungual taka pawm a ni.

He bill puluttu Law & Judicial enkawltu Chief Minister Pu Lalduhoma chuan he dan siamthat turah hian Section 2-na an tih danglam tur chu a pawimawh hle dawn tih sawiin, inneihna zawng zawng chu mipa leh hmeichhe huap veka siam thin a ni a, hmeichhia leh mipa Mizo an nih ve ve leh Mizo mipa hnamdang nupuia neitea huap dawn a, Mizo hmeichhia in hnamdang pasal a neihin a huap ve tawh dawn lo tih sawiin, hnamdang pasala nei Mizo hmeichhiate Mizo-na chu a tawp tawh dawn a, an fate chuan an nute Tribal nihna te an claim thei tawh dawn lo tih a sawi a ni.

Byte: CM on Mizo Marriage Amendment Bill,

Chief Minister chuan dan tharah chuan nupui pakhat aia tam neih (bigamy) a khap tih sawiin, nupui pasal then ten midang an nei leh dawn a nih chuan an nupui/pasal hmasa te nen an inthen chiang tawh tih nemnghehna tur Divorce certificate phut a ni tawh dawn a ti a, hei bakah hian dan hman laia nupa inthenna tlak nia danin a sawi phar natna nei tel chu phar natna neih chu vanduaiana thil a ni a,

inneih thutiamah "hrisel lai leh bawrhsawm lai pawhin" tia thu an tiam thin avangin phar natna vanga inthen phal ringawt chu a dik lo tiin Leprosy hi an paih a ti.

Roluahna certificate chungchang pawh dah thar a ni a, Women Commission leh MHIP te rawt angin hmeichhiate venhim nan hmeichhiain sum an chhuah chuan inneiha a chhawm luh piah lamah an nupaa an thawhchhuah dun atanga zaa 50 pel lovin hmeichhia in a chang ve thei tawh dawn a. Marriage Price tih chu Mizo tawngin Man leh Mual tia thlakdanglam rawt a ni bawk.

Kan corr report lo ngaithla ang.

*The Mizo Marriage and Inheritance of Property (Amendment) Bill, 2026 hian dan hman lai hming The Mizo Marriage, Divorce and Inheritance of Property Act tih chu Kristiante chu dam chhunga innei tura thutiam thin an nih angin inneihna dan leh inthenna dan awm kawp chu a rem lova, chuvang chuan divorce chu paihin inneihna dan leh ro inluah dan tia thlak a ni a, Automonous District council pathumte a huap lo tura tih ni mahse ADC huamchhunga Mizo Customary Law hmang engemawzat te chu a huap tho dawn a, mahni hnam dan neite erawh chu a huap loh ngaiin a huap lo reng dawn niin he bill puluttu Chief Minister Pu Lalduhoma chuan a sawi a ni.*



## **CM : ASSEMBLY**

Eptu MLA ten Chief Minister Pu Lalduhoma'n ZPM kaihhruai sorkarin sorkar hmasa leiba a rulh sak tia sawi fo chu an ngaimawh tih an sawi.

Vawiin Assembly Session-a Hachhek bialtu MLA Pu Robert Romawia zawhna chhangin Finance department changtu, Chief Minister Pu Lalduhoma chuan sorkar-in leiba hnutchhiah a tum lo ti-a an sawi chu sum puk leiba (borrowing rulh bang, outstanding debt) sawina a ni lo a, an hnunga mi te rulh tura thil lo lei bat emaw sum awm si loa hna lo inthawhtir ve ringawt emaw avanga ba siam chawp (committed liabilities) sawina a ni a ti a. Heng leiba (committed liabilities) siamtu tam tak chu Budget provision awm si loa supply order issue te, work order pek te a ni ber tih sawiin, tun Sorkar chuan pumpelh a tum a ti a.

Kum 2018 atanga sorkar hmasa leiba an insiamchawp (committed liability)-PWD-ah cheng nuai sang 1, 287 an rulh sak tawh a, cheng nuai 583 rulh hma bak an la nei a, PHE-ah cheng nuai sang 4,842 an rulh sak tawh a, rulh hmabak cheng nuai sang 5,801 an la nei a, P&E-ah cheng nuai 182 an rulh sak tawh a, cheng nuai sang 1, 262 rulh hma bak a la awm a ti a. Hetianga an tih zel chuan a hnulama sorkar te phur rit a ni dawn tih a sawi a ni.

Hemi chungchangah hian Leader of Opposition Pu Lalchhandama Ralte bakah Congress MLA Pu Ngunlianchunga, leh MNF MLA Dr R. Lalthangliana te chuan sorkar hmasa leiba rulh chu sorkar awm tawh zawng zawng tih thin a nih avangin sorkarin leiba a rul ti lova sorkar hmasa leiba a rulh sak tia Chief Minister Pu Lalduhoma'n a sawi fo chu mawi lo an tih thu an sawi a, Leader of Opposition Pu Lalchhandama chuan mawhphurhna la in sorkarna an siam tawh angin, leiba rulh chu an mawhphurhna a ni tawh a ti a, Congress MLA Pu Ngunlianchunga pawhin "kan rulh sak" tih lai chu tute ba nge a rulh sak tih zawhna zawtin, sorkarin leiba a rul tiin sawi se a mawi zawk a ti a, MNF MLA Dr R. Lalthangliana pawhin sorkar

leiba rulh a midang mawhpuh zel chu sorkar hmasa te tih dan thin a ni lo tih sawiin, Chief Minister pawhin a sawi dan a thlak danglam chhoh zel a beisei tih a sawi a ni.

**Byte : Debate**

<><><>

## **ASSEMBLY- BILL**

Vawiin Mizoram Legislative Assembly thukhawmin, The Mizoram (Registration of Tourist Trade ) ( Amendment ) Bill, 2026 chu lungrual takin a pawm.

He Bill puluttu Minister Pu Lalnghinglova Hmar chuan he bill in a tum ber chu Municipal area pawn lama park, picnic na hmun leh intihhlamna hmun dangte ziah luh leh enkawl tura belh thar a ni a ti a, chumi awmzia chu tunhmaa tourism department in a chan ngai loh alo chan tak si ah chuan tuna act kal mekah hian hengte hi belh luh a ngai ta a ni a ti.

Hei bakah hian sawrkar in sumdawngte an inziah luh leh an in enkawl na dan siam a phalsak thu a sawi a, hemi ah hian a thei nazawng in a an duh ang ang a Hotel ,homestay leh a dangte an kalpui ringawt loh nan Tourism department in dan an zawm tur siamsak phalsak anih thu a sawi , hei bakah hian hotel, homestay, park leh a dang siam tumte leh lo siam tawh te an tling tawk em tih enfiah leh endik thin a ni dawn a ni a ti.

<><><>

## **YMA RUIHHLO**

YMA Kumpulan “ Ruihhlo Do” bawhzuina kal zelah Central YMA chuan kar kalta atang khan Aizawl khawpui chhungah beihpui a thlak tan.

VC

*Central YMA kaihhruaia nizana Aizawl Dawrpui Multipurpose Hall-a Aizawl khawpui chhunga Branch YMA 111 te kalkhawmin an rel angin Aizawl khawpui chhunga Branch hrang hrangte hi Zone 10 ah inthen a ni a. Zone tina hian Anti-Drugs Squad ( ZADS) din a ni a, Puipate inruatin an huamchhunga Branch tin atangin ZADS member tur 3 theuh inruat a ni a. Zone tin hian Duty Post siamin kar kalta ni 20 atang khan ruihhlo do beihpui hi an tan ta a ni.*

*Heng Zone hrang hrang Duty Post te hi Central YMA hruaituten tlawh kualin bul tan nan Rs.10,000/- theuh an hlan a, ZADS hruaitute leh memberte infuihna hun an hmang nghal bawk. Central YMA hian a tul angin Zone tin te mamawh leh harsatna te a enpui zel dawn tih an sawi a ni.*

*Central YMA thuchhuah tarlan danin, Zone tina hruaitute leh Memberte an phur a, an huamchhung theuhva ruihhlo do beihpui thlakna kawngah theihtawp chhuah a beih an tum a, khawtlang mipuite tawiawmna an beisei bawk.*

<><><>

## **MAMB**

Mizoram Agriculture Marketing Board Co Chairman Dr KC Lalmalsawmzauva chuan MAMB in sawhthing rate a siamna chhan chu Sumdawng ten duh duha a man an thunun loh nan a ni a ti.

Vawiin khan MAMB chuan Mizoram hmar lam district 7:Aizawl, Serchhip, Champhai, Kolasib, Mamit, Khawzawl leh Saitual district-a District Agricultural Marketing Committee (DAMC) member te, Secondary Collection Centre(SSC) puipa te leh Society hruaitute te tan inrawnkhawmna hun, 'consulative meeting on thlai thar market' MINECO-a a buatsaihah he thu hi sawiin Dr Lalmalsawmzauva chuan nikum lamah DAMC/SCC kutah an dah a, an hralh hman loh hlau khan an intih hniam siak ta vak a, sumdawng lam an fing si a, an duh ang angin an chingkual a, chuvangin MAMB chuan India rama Mandi hrang hrang sawhthing rate en chungin, Buyer leh Seller tana hlawk ve ve turin rate a khaikhawm ta a ni a ti a. MAMB in Sawhthing rate a siam hi sawrkar sum ren vang emaw, a sen hreh vang a ni ngawt lo a ni a ti.

Vawiin inrawnkhawmna meeting hi Agriculture & Family Welfare Secy Pi Ramdinliann a kaihruai a, thlai thar lei leh hralh chungchanga Sawrkar thiltum kalkhawmte hrilhhriatna hun hman a ni a, sawhthing rate (Reserved Price) siam dan turte leh Thlai thar lei leh hralh kaihhnawih thil pawimawh hrang hrang te sawiho a ni.



#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



#### **CEC**

Chief Election Commissioner Gyanesh Kumar chuan electoral roll dik tak neih chu mipui rorelna democracy inngahna bul anih thu a sawi. Vawiina New Delhi-a Bharat Mandapam-a National Round Table Conference of Election Commission of India leh State Election Commissioners hun hmannaah he thu hi sawiin Pu Kumara chuan Special Intensive Revision chu vote nei zawng zawng electoral roll a ziahluh bakah vote nei thei lo vote neia lo awm site paihna tur a ni a ti bawk.SIR hi Bihar ah hlawhtling taka kalpui a ni a. Tunah hian State 12 ah kalpui mek niin an zinga state 11 te chuan electoral roll thar an tlangzarh tawh a ti a. Tun dinhmunah chuan ECI leh State Election Commossion te an thawhho that lehzual a hun tawh thu a sawi bawk a ni.



#### **PRESIDENT**

President Droupadi Murmu-i chuan ni hnih cham turin vawiin chawhnu khan Maharashtra a thleng. Pi Murmu-I hi airport ah Maharashtra Governor Acharya Devvrat. Chief Minister Devendra Fadnavis, Deputy Chief Ministers Eknath Shinde leh Sunetra Ajit Pawar, Minister of State for Protocol Jayakumar Rawal, Mayor Ritu Tayde, leh Chief Secretary Rajesh Agarwal ten an lo hmuak a. Mumbaia Lok

Bhavan atangin PD Hinduja Hospital buatsaih Saving Lives and Building a Healthier Bharat' chu vawiin tlai khan a tlangzarh a. Naktuk ah Pi Murmu-i hian National Arogya Fair 2026 Shegaon a buatsaih a hmanpui dawn bawk a ni.

<><><>